

BOSNA I HERCEGOVINA
FEDERACIJA BOSNE I HERCEGOVINE
FEDERALNO MINISTARSTVO UNUTRAŠNJIH POSLOVA
FEDERALNO MINISTARSTVO UNUTARNJIH POSLOVA
SARAJEVO

**PRAVILNIK
O TEHNIČKIM SREDSTVIMA I OPREMI ZA OBAVLJANJE
POSLOVA FIZIČKE I TEHNIČKE ZAŠTITE**

Sarajevo, juli 2014. godine

Na osnovu člana 10. stav 3. i člana 11. stav 2. Zakona o agencijama i unutrašnjim službama za zaštitu ljudi i imovine („Službene novine Federacije BiH“, br. 78/08 i 67/13), federalni ministar unutrašnjih poslova donosi

PRAVILNIK O TEHNIČKIM SREDSTVIMA I OPREMI ZA OBAVLJANJE POSLOVA FIZIČKE I TEHNIČKE ZAŠTITE

I – OSNOVNE ODREDBE

Član 1.

Ovim pravilnikom propisuju se tehnička sredstva i oprema za obavljanje poslova fizičke, tehničke ili fizičke i tehničke zaštite, koja predstavljaju uvjet za rad i izdavanje odobrenja za rad pravnim ili fizičkim licima koja osnivaju agenciju (osnivač), kao i tehnička sredstva i oprema za obavljanje poslova fizičke i tehničke zaštite u podružnicama koje se osnivaju na području drugog kantona van sjedišta agencije u skladu sa Zakonom o agencijama i unutrašnjim službama za zaštitu ljudi i imovine („Službene novine Federacije BiH“, br. 78/08 i 67/13- u daljnjem tekstu: Zakon).

Član 2.

Kantonalno ministarstvo unutrašnjih poslova (u daljnjem tekstu: kantonalno ministarstvo) odobrenje za rad i odobrenje za obavljanje poslova fizičke i tehničke zaštite u podružnicama može izdati samo agencija koja ima odgovarajuća tehnička sredstva i opremu propisana ovim pravilnikom.

Član 3.

(1) U smislu ovog pravilnika tehnička sredstva i oprema za obavljanje poslova fizičke i tehničke zaštite čine sva tehnička sredstva, oprema, uređaji, instalacije, aparati, prostori i druga tehnička sredstva i opremu koja služi za pravilnu, potpunu i zakonitu zaštitu ljudi i imovine i zaštitu čuvara i drugih lica.

(2) Tehnička sredstva i oprema iz stava (1) ovog člana obuhvataju sljedeće:

- a) poslovni prostor;
- b) sredstva za smještaj opreme i dokumentacije (kasa, ormar);
- e) skladišni prostor;
- c) vozilo;
- d) radnu uniformu;
- f) telefonsku mrežu;
- g) GPS uređaj;
- h) dojavni centar;
- i) radioveza.

Član 4.

(1) Odredbe ovog pravilnika primjenjuju se i na agencije koje osnivaju fizička lica prema članu 12. Zakona, i njihove podružnice koje se osnivaju prema članu 10. Zakona.

(2) Odredbe ovog pravilnika primjenjuju se i na unutrašnje službe zaštite koje se osnivaju u pravnim licima (vlastita služba zaštite) u skladu sa Zakonom.

II - TEHNIČKA SREDSTVA I OPREMA ZA RAD I IZDAVANJE ODOBRENJA ZA RAD AGENCIJE

Član 5.

Kada je osnivač agencije pravno lice iz člana 11., odnosno fizičko lice iz člana 12. Zakona za dobijanje odobrenja za rad potrebno je imati sljedeća tehnička sredstva i opremu i to:

- 1) za obavljanje poslova fizičke zaštite
 - a) poslovni prostor;
 - b) ormare ili kase za dokumentaciju;
 - c) kase za oružje i municiju;
 - d) skladišni prostor za smještaj oružja i municije;
 - e) direktnu telefonsku liniju, faks i radioveza;
 - f) vozilo;
 - g) ličnu opremu (uniforma i druga sredstva.)

- 2) za obavljanje poslova tehničke zaštite:

- a) poslovni prostor;
- b) ormare ili kase za smještaj dokumentacije;
- c) ugrađenu direktnu telefonska linija i faks;
- d) vozilo;
- e) dojavni centar; i
- f) ličnu opremu –uniforma sl,

3) za obavljanje poslova fizičke i tehničke zaštite, mora imati uvjete iz tačke 1) i dojavni centar.

III - TEHNIČKA SREDSTVA I OPREMA ZA RAD I IZDAVANJE ODOBRENJA ZA POSLOVA ZAŠTITE U PODRUŽNICAMA

Član 6.

(1) Za rad i izdavanje odobrenja za obavljanje poslova fizičke ili tehničke zaštite u podružnicama koje se osnivaju u skladu sa članom 10. Zakona, agencija je dužan u podružnici imati sljedeća tehnička sredstva i opremu i to:

- a) poslovni prostor;
- b) ormar ili kasu za dokumentaciju;
- c) direktnu telefonsku liniju, faks i radiovezu;
- d) ličnu opremu (uniforma i druga sredstva)

(2) Ukoliko agencija u podružnici ima više od 15 čuvara u tom slučaju dužna je da, pored tehničkih sredstava i opreme iz stava (1) ovog člana ima i vozilo i skladišni prostor za smještaj oružja i municije.

IV- SADRŽAJ TEHNIČKIH SREDSTAVA I OPREME ZA OBAVLJANJE POSLOVA TEHNOČKE I FIZIČKE ZAŠTITE

Član 7

Tehnička sredstva i oprema iz člana 3. stav (2) ovog pravilnika treba imati sadržaj utvrđen u čl. 8. do 14. ovog pravilnika.

1. Poslovni prostor

Član 8.

(1) Prostor iz člana 3. stav (2) tačka a) ovog pravilnika sastoji se od najmanje dvije prostorije koje su smještene jedna uz drugu u jednom objektu sa mokrim čvorom.

(2) Prostor iz stava (1) ovog člana mora imati sredstva za gašenje požara u skladu sa propisima o zaštiti od požara.

(3) Ulazna vrata i prozori u prostoru iz stava 1. ovog člana moraju biti zaštićena od neovlaštenog ulaska odgovarajućim mehaničkim i tehničkim sredstvima (metalne rešetke sa staklenim otvorima, protuprovalne folije ili sistemi tehničke zaštite i sl.).

(4) Na ulazu u prostor iz stava (1) ovog člana mora biti istaknut naziv agencije ili službe zaštite za zaštitu ljudi i imovine, a u podružnicama agencije ili podružnicama službe zaštite upisuje se i naziv podružnice.

2. Ormari i kase

Član 9.

(1) Ormar i kase iz člana 3. stav (2) tačka b) ovog pravilnika, služe za čuvanje službenih dosjea, predmeta, dokumenata i evidencija, te se osiguravaju sigurnosnom bravom koja garantira sigurnost čuvanih predmeta i dokumenata.

(2) Ormari i kase iz stava (1) ovog mogu biti metalne i drvene.

3. Skladišni prostor

Član 10.

(1) Ako agencije posjeduje ili namjerava nabaviti oružje duge cijevi koju koristi prilikom pratnje i osiguranja prijevoza novca i dragocjenosti ili posjeduje više od 20 pištolja, mora imati skladišni prostor za smještaj i čuvanje tog oružja i municije.

(2) Skladišni prostor iz stava (1) ovog člana treba da:

- a) je izrađen prema propisima koji reguliraju način izrade skladišta eksplozivnih materija;
- b) je smješten uz jednu prostoriju, odnosno odvojen neprobojnom pregradom;
- c) ima otvor vani (prozor i vrata) odgovarajućih dimenzija i da je osiguran rešetkama ili protuprovalnim alarmima, odnosno protuprovalnim vratima od mogućnosti neovlaštenog ulaza;
- d) je opremljen kasom koja mora biti izrađena od takvog materijala da izdrže djelovanje vatre najmanje 30 minuta, što se dokazuje atestom proizvođača ili institucije koja ima propisanu opremu za ispitivanje vatrootpornosti.

(3) Ako agencija ili služba zaštite posjeduje manje od 20 pištolja, nije dužna da ima skladišni prostor, stim da je dužna u prostoru iz člana 10 ovog pravilnika da osigura kasu iz stava (2) tačka d) ovog člana za smještaj i čuvanje tog oružja.

(4) Skladišni prostor iz stava (1) ovog člana mora biti opremljen samo uređajima na toplu vodu, vodenu paru i topli zrak koji se ubacuje izvana.

(5) Sistem za uključivanje rasvjete mora se instalirati izvan skladišnog prostora.

(6) Odredba stava (1) ovog člana odnosi se i na agencije koja vrši poslove fizičke zaštite u sjedištu agencije ili podružnice.

4. Telefonska mreža

Član 11.

(1) Telefonska mreža obuhvata direktnu telefonsku liniju ili mobilni telefon, radiovezu i fax.

(2) Agencija u prostoru iz člana 3. stav 2. tačka a) ovog pravilnika, mora imati instalirane najmanje dvije direktne telefonske linije i faks, a u prostoru podružnice može imati instaliranu jednu direktnu telefonsku liniju i faks.

(3) Zaposlenici agencije u toku obavljanja poslova fizičke ili tehničke zaštite moraju imati telefonsku ili radiovezu s agencijom ili odgovornom osobom u agenciji ili podružnici.

5. Vozilo

Član 12.

(1) Agencija mora imati vozila za obavljanje poslova fizičke ili tehničke zaštite koja moraju biti posebno i vidno označena.

(2) Posebna oznaka se ispisuje na vozilu u obliku logotipa ili naziva agencije.

(3) Agenciji je zabranjeno koristiti dizajn i oznaku koju koriste vozila policije, kao i svjetlosne signale (rotirajuća svjetla) ili zvučne signale vozila policije ili oružanih snaga Bosne i Hercegovine.

6. Radna uniforma

Član 13.

(1) Agencija mora imati radnu uniformu za zaposlena lica u agenciji koja obavljaju poslove fizičke ili tehničke zaštite, koja se osigurava u skladu sa odredbama člana 34. Zakona.

(2) Agencija odnosno služba zaštite za obavljanje poslova fizičke zaštite može imati i koristiti neprobojni prsluk.

(3) Za zaposlena lica koja osiguravaju javne skupove gdje po procjeni organizatora skupa može doći do narušavanja javnog reda i mira većeg obima, agencija može imati i koristiti i zaštitne kacige.

7. Dojavni centar

Član 14.

Agencija koja se bavi poslovima tehničke zaštite mora imati dojavni centar koji se uspostavlja i oprema u skladu sa propisom iz člana 30. stav 5. Zakona koji donosi Vlada Federacije BiH.

III - UTVRĐIVANJE PROSTORNIH I TEHNIČKIH UVJETA ZA IZDAVANJE ODOBRENJA ZA RAD I ODOBRENJA ZA OBAVLJENJE POSLOVA FIZIČKE I TEHNIČKE ZAŠTITE U PODRUŽNICAMA

Član 15.

(1) Postojanje tehničkih sredstava i opreme za obavljanje poslova fizičke ili tehničke zaštite utvrđene u čl. 5. do 14. ovog pravilnika utvrđuje kantonalno ministarstvo, osim kada je osnivač agencije strano pravno ili fizičko lice iz člana 12.a Zakona za koje postojanje tehničkim sredstava i opreme utvrđuje Federalno ministarstvo.

(2) Za utvrđivanje uvjeta iz stava (1) ovog člana kantonalno ministarstvo formira posebnu komisiju.

(3) Komisija se sastoji od dva člana, od kojih je jedan zadužen za nadzor nad radom agencije, a drugi za zaštitu od požara.

Član 16.

(1) Uvjete iz člana 15. stav (1) ovog pravilnika komisija utvrđuje kada osnivač podnese zahtjev za izdavanje odobrenja za rad agencije ili odobrenje za obavljanje poslova fizičke ili tehničke zaštite u podružnicama.

(2) Uvjete u pogledu prostora i tehničkih sredstava i opreme komisija utvrđuje putem neposrednog pregleda tehničkih sredstava i opreme i prostora i pregledom pisanih dokaza priloženih uz zahtjev.

(3) O činjeničnom stanju koje se utvrđuje prema stavu (2) ovog člana komisija sastavlja zapisnik. Taj zapisnik se sastavlja prema odredbama Zakona o upravnom postupku koje se odnose na zapisnik.

(4) Zapisnik mora obavezno da sadrži ocijenu komisije da su ispunjevi svi propisani uvjeti u pogledu prostora i tehničkih sredstava i opreme, ili da nisu ispunjeni svi propisani uvjeti i moraju se konkretno navesti uvjeti koji nisu ispunjeni.

(5) Zapisnik potpisuju svi članovi komisije. Taj zapisnik predstavlja dokaz za činjenice sadržane u zapisniku i koristi se u postupku rješavanja zahtjeva za izdavanje odobrenja za rad agencije odnosno službe zaštite u skladu sa odredbama čl. 10. do 19. Zakona.

Član 17.

(1) Utvrđivanje uvjeta iz člana 15. stav (1) ovog pravilnika kada je osnivač agencije strano pravno ili fizičko lice iz člana 12.a Zakona, Federalno ministarstvo vrši putem organizacione jedinice u kojoj se organizuju poslovi inspekcijskog nadzora nad radom agencija i zaštite od požara.

(2) Uvjete iz stava (1) ovog člana utvrđuje organizaciona jedinica iz stava 1. ovog člana na način propisan u članu 16. ovog pravilnika..

Član 18.

(1) Ako nakon donošenja rješenja ili u toku obavljanja poslova fizičke i tehničke zaštite dođe do promjene u odnosu na prostor i tehnička sredstva i opremu utvrđena u zapisniku iz člana 16. ovog pravilnika agencija je dužna te promjene pismeno prijaviti kantonalnom ministarstvu u roku od sedam dana od nastanka promjene.

(2) U slučaju postojanja promjene iz stava (1) ovog člana, ne može se početi sa radom u novom prostoru dok se ne utvrdi postojanje tehničkih sredstava i opreme propisanih u članu 3. ovog pravilnika.

IV- NADZOR NAD PROVOĐENJEM PRAVILNIKA

Član 19.

Nadzor nad provođenjem ovog pravilnika vrši Federalno ministarstvo unutrašnjih poslova-Federalno ministarstvo unutanjih poslova.

V – PRELAZNE I ZAVRŠNE ODREDBE

Član 20.

(1) Prostor, tehnička sredstva i oprema za obavljanje poslova fizičke i tehničke zaštite koje su agencije i službe zaštite osigurale po propisima koji su važili do dana stupanja na snagu ovog pravilnika ostaje u radu agencije i službi zaštite, s tim što treba osigurati prostor, tehnička sredstva i oprema koja je nova po ovom pravilniku.

(2) Novi prostor, tehnička sredstva i oprema iz stava 1. ovog člana agencija i služba zaštite su dužne osigurati u roku od tri mjeseci od dana stupanja na snagu ovog pravilnika.

(3) Ukoliko agencija ili služba zaštite nije u mogućnosti osigurati prostor, tehnička sredstva i opremu u radu iz stava (2) ovog člana, u tom slučaju taj rok se može, na pismeni zahtjev produžiti za novih rok od tri mjeseci.

(4) Zahtjev iz stava (3) ovog člana se podnosi kantonalnom ministarstvu koje je izdalo odobrenje za rad agencije ili službe zaštite, a rješava se na osnovu činjeničnog stanja koje utvrdi inspektor i u tome sačini zapisnik.

Član 21.

Postupci koji su pokrenuti za utvrđivanje tehničkih sredstava i opreme za rad i izdavanja odobrenja za rad agencije do dana stupanja na snagu ovog pravilnika bit će okončani prema odredbama ovog pravilnika.

Član 22.

Danom stupanja na snagu ovog pravilnika prestaje da važi Pravilnik o tehničkim sredstvima i opremi za obavljanje poslova fizičke i tehničke zaštite "Službenim novinama Federacije BiH, broj 60 /09).

Član 23.

Ovaj pravilnik stupa na snagu osmog dana od dana objavljivanja u "Službenim novinama Federacije BiH".

Broj: _____ /14
_____ 2014. godine
Sarajevo

MINISTAR
Predrag Kurteš